

**ՀԱՄԱՌՈՏ ՏԵՂԵԿԱՏՎՈՒԹՅՈՒՆ ԾՐԱԳՐՈՒՄ ԲԵՐՎԱԾ
ՎԻՃԱԿԱԳՐԱԿԱՆ ՑՈՒՑԱՆԻՇՆԵՐԻ ԵՎ ԴՐԱՆՑ ՀԱՇՎԱՐԿՄԱՆ
ՄԵԹՈԴԱԲԱՆՈՒԹՅԱՆ ՎԵՐԱԲԵՐՅԱԼ**

1. Հիմնական վիճակագրական ցուցանիշների սահմանումները, հաշվարկման մեթոդաբանությունը, չափորոշիչները և այլ համապատասխան տեղեկատվությունը զետեղվում են. «Հայաստանի Հանրապետության սոցիալ-տնտեսական վիճակը» տեղեկատվական ամսական զեկույցների եռամսյակային թողարկումների «Հավելված» հատվածում: Հատվածը մշտապես նորացվում է՝ միջազգային չափանիշներին համապատասխան, ավելացվում են նոր ցուցանիշներ և տրվում դրանց նկարագրությունները և սահմանումները:

2. Ցուցանիշների հաշվարկման մեթոդաբանական պարզաբանումներն՝ առանձին հատվածների տեսքով զետեղվում են նաև վիճակագրական ժողովածուներում, տեղեկագրերում, տարեգրքերում և այլն:

3. Արժույթի միջազգային հիմնադրամի վիճակագրական վարչությունը տարբեր երկրների վիճակագրական տեղեկատվության որակի, թափանցիկության, տվյալների համադրելիության ապահովման, միջազգային հանրությանը դրանց օգտագործման ավելի լայն հնարավորությունների ընձեռնման, կիրառվող մեթոդաբանության և դրա հետագա զարգացման ծրագրերին տեղեկացնելու նպատակով, հիմնել է Տվյալների տարածման ընդհանուր համակարգ և Տվյալների տարածման հատուկ ստանդարտ:

Թվարկվածներից՝ Տվյալների տարածման ընդհանուր համակարգին (հիմնվել է 1997 թվականի դեկտեմբերի 19-ին) Հայաստանի Հանրապետությունն անդամագրվել է 2001 թվականի մարտի 29-ին:

2003 թվականի նոյեմբերի 7-ից Հայաստանի Հանրապետությունն անդամագրվեց նաև Տվյալների տարածման հատուկ ստանդարտին, դրանով իսկ դառնալով վիճակագրության բնագավառում կիրառվող միջազգային ամենախիստ ստանդարտին անդամագրվող 54-րդ երկիրը:

Համաձայն Տվյալների տարածման հատուկ ստանդարտի պահանջների, համակարգին անդամակցող բոլոր երկրների վիճակագրական տեղեկատվությունը նկարագրող մեթոդաբանական տվյալները (մեթատվյալները)՝ նախապես մշակված ձևաչափերի միջոցով, տեղադրվում են Արժույթի միջազգային հիմնադրամի ինտերնետային կայքի՝ հատուկ այդ նպատակով բացված ինտերնետային էջում: Նշված ինտերնետային էջը նպատակ ունի հանրությանն առավել լայն հնարավորություններ ընձեռել ծանոթանալու ցանկացած երկրի վիճակագրական տեղեկատվության համակարգի բաղկացուցիչ մասը

կազմող, պարբերաբար արդիականացվող հիմնական մակրոցուցանիշներին, ինչպես նաև դրանց մշակման մեթոդաբանական մոտեցումներին:

Տվյալների տարածման հատուկ ստանդարտը պարունակում է դրա մշտական պահպանման խիստ պահանջներ, ինչի վերաբերյալ տեղեկությունը հրապարակայնորեն առկա է Արժույթի միջազգային հիմնադրամի ստանդարտների տարածման տեղեկագրում: Տեղեկագիրը ներառում է համապարփակ փաստաթղթեր անգլերեն լեզվով՝ Տվյալների տարածման հատուկ ստանդարտի տվյալների կատեգորիաների մասով Հայաստանի Հանրապետության վիճակագրական փորձառության վերաբերյալ, որը վկայակոչում է Հայաստանի Հանրապետության ազգային վիճակագրական ծառայության պաշտոնական ինտերնետային կայքում այդ նպատակով վարվող Ազգային ամփոփ տվյալների էջում ներառված երկրի արդիական տվյալները: Նույն կայքում են տեղադրվում նաև մեթատվյալների հայերեն և ռուսերեն տարբերակները:

4. 2008թ. ապրիլի 29-ին Միավորված ազգերի կազմակերպության Տնտեսական և սոցիալական խորհրդի կազմակերպական նստաշրջանում Հայաստանն ընտրվել է Միավորված ազգերի կազմակերպության վիճակագրական հանձնաժողովի նոր անդամ: Անդամակցությունը չորս տարի ժամկետով է՝ սկսած 2009թ. հունվարի 1-ից:

5. Հայաստանի Հանրապետության ազգային վիճակագրական ծառայության ինտերնետային էջում մշտապես գետեղվում են վիճակագրական հրապարակումները (հայերեն, ռուսերեն, անգլերեն լեզուներով), որոնցում հիմնականում ընդգրկված են վիճակագրական ցուցանիշների սահմանումները և մեթոդաբանական պարզաբանումները:

6. Միջազգային վիճակագրական մեթոդաբանության զարգացման առաջընթացը հասանելի դարձնելու և դրան իրազեկ լինելու նպատակով, Հայաստանի Հանրապետության ազգային վիճակագրական ծառայության հասցեով ստացվում և գրադարանում պահպանվում են միջազգային տարբեր կազմակերպությունների, ինչպես նաև այլ երկրների վիճակագրական ծառայությունների հրապարակումները: